

摛藻堂四庫全書薈要

集部

欽定四庫全書叢要

集部

漢魏六朝百三家集卷九十三

詳校官員選知縣臣吳甸華



欽定四庫全書

漢魏六朝百三家集要卷一萬九千六百八十四

集部

漢魏六朝百三家集卷九十二

明 張溥 輯

僧孺集

賦

賦體

雜沓兮翠旌容與兮龍駕新桐兮始華孔雀兮初化思
治兮終朝求人兮仄夜竟大德之未酬何飛光之徒舍

表

吏部郎表

臣生輕飛揮品細疏壤寂寞州間取淪空竇不自求於
善管寧許人以能官從班隨牒自安疎遠豈望翰飛終
知跡滯一逢浸漬幾聞昭晉假拙為心變奇成偶寧為
天覆地長復與雨露相滋秋成春發必如暄寒無爽自
變泥塗多超嵩鄧屢考固其比越在累誠於可聞方愧
朱紫永情鈞衡固惟許李終非王畢取其清尚同所經

企求之碎密寧可庶幾

為臨川王讓太尉表

臣聞一匹以長望千里而成累空輪易聘觸三尺而不
登苟曰違方難用適遠安車駟馬望高闕而朝至繡服
緹麾輶康衢而暮返行瞻畫虎居對蒼龍陞下海涵春
育日鏡雲伸追大道之無私惜微臣之宜極

為南平王讓儀同表

臣聞石瓠難剖用謝餅罍瘞木云疵事乖丹艤逢聖徵

天一朝賞至非能聲均吳楚譽均梁陳故以神夢紫霄
心飛丹掖品同儀比愧眩莫殊

為韋雍州致仕表

一旦攀附遂無涯限排雲矯漢飛捧待翼陸離蟬組照
灼旛旗受脈推轂執珪奉酌變狹室於高門改小冠於
侯服况復還周紐其六印歸齊列其五鼎常懼輪輕載
積基薄墉高器覆危傾人指鬼瞰老與年并疾隨衰及
途遙齒截漏迫鐘鳴高春之景一斜不周之風忽至菌

轉夕陰倏駛無幾葷莽朝采飄零已及仰朱闕而掩涕
俯濛谷而自悲豈復式瞻拱默仰接鐘鼓儻惟蓋未親
東岳稍駐擊壤鼓腹其賜猶多

為南平王妃拜改封表

拜妾為南平王妃奉命震慙有灼丹寸妾瞻絲望悅
且或多慙鏡史觀圖是焉知愧以茲眇薄有儼蕃儀
糾組不聞饗酏蓋闕不悟玄造曲被徽渥愈臻改服
遯名事華品貴恩深外邸榮照下庭豈期韜弱所能

勝荷

謝歷表

竊以龍馭不爽靡見浸薄鳳職是司曾無是眺璧聯珠
燦輪映階平義實明時事惟均政固以先天俟其餘始
軌杓驗其平分九瀛仰化萬寓依朔

牋

逮詣南司辭府牋

下官不能避溺山隅而正冠李下既貽疵辱方致徽繩

解籙收簪且歸初服竊以董生偉器止相驕王賈子上
才爰傳卑主下官生年有值謬仰清塵假翼西雍竊步
東閣多慙袵服取亂長裾高榻相望直居坐右長階如
畫獨在僚端借其從容之詞假以寬和之色恩禮遠過
申白榮望多廁應徐厚德難逢小人易說方謂離腸墮
首不足以報一言露膽披誠何能以酬屢顧寧謂尉羅
裁舉微禽先落閭闈始吹細草仍墜一辭九畹方去五
雲縱天網是漏聖恩可恃亦復孰寄心骸何施眉目方

當橫潭亂海就魚鼈而為羣披榛捫樹從虺蛇而相伍
豈復仰聽金聲式瞻玉色顧步高軒悲如霞委跔嗣下
席淚若綆縻

啟

謝除吏部郎啓

自一遇休明多逢渥澤出斯溝壤置之霄漢清塗華轍
叨廁累仍顯職名階俄來倏至而智効必其無取尤忘
忽焉已彰不意涵養更滋霧靄愈此始職樞華紛體恒

選知非腆族必待俊民何言賤劣所或叨假循涯測限
生所不勝瞻恩奉德死何能報

謝賜于陁利國所獻檳榔啟

竊以文軌一覃充伋斯及入侍請朔航海梯山獻琛奉
貢充庖盈府故其取題任賦多述俞書萍實非甘荔葩
慙美

謝齊竟陵王使撰衆書啟

伏惟殿下銅爵始成早擣從后之句柏梁初構首屬駿

駕之辭楚史所受曾不云述沛獻斯陳良未足採徒以
願托後車以望西園之客攝齊下坐有糅南皮之遊謬
服同於魯儒竊吹等乎齊樂

為蕭監利求入學啟

竊以矯首伺飛不如修弋跪足念遠莫若驅鑣故樸斷
成於丹艤篠蕩資於枯羽敢因草木有志庠均為山資
於一簣學海漸其微流

答釋法雲啟

辱告惠示并主上所答群臣仰諮神滅論伏覽循環載
深鑽奉發蒙祛蔽朗若披雲竊以事蘊難形非聖莫闡
理寂區位在愚成惑若非神超繫表思越機前豈能燭
此微言若開金石洞茲玅境曾靡榛蹊喻之以必薦示
之以如在使夫持論者不終泥於遙轍專謬者無永沈
於惑海預奉淵暮孰不懼肅裁此酬白不申擊舞王僧

孺呈

教

南海郡求士教

文舉下車寤夢於根矩長孫入境明發於龍丘此境三
閩奧壤百越舊都漢開吳別分星畫部風序泱泱衣簪
斯盛其川岳所產豈直明珠大貝桂蠹翠羽而已哉孝
實人經則有羅威唐頌學惟業本又聞陳元士燮至於
高尚獨往相望於嶧崿懷仁抱義繼蹤於前史

書

與何炯書

近別之後將隔暄寒思子為勞未能忘弭昔季叟入秦
梁生適越猶懷悵恨且或吟謠况岐路之日將離嚴網
辭無可憐罪有不測蓋畫地刻木昔人所惡叢棘既累
於何可聞所以握手戀戀離別珍重弟愛同鄒季洋洋
承睫吾猶復抗手分背羞學婦人素鍾肇節金颺戒序
起居無恙動靜履宜子雲筆札元瑜書記信用既然可
樂為甚且使目明能祛首疾甚善甚善吾無昔人之才
而有其病癲眩屢動消渴頻增委化任期故不復呼醫

飲藥但恨一旦離大辱蹈明科去皎皎而非自汙抱鬱
結而無誰告丁年蓄積與此銷亡徒竊高價厚名橫叨
公器人爵智能無所報筋力未之酬所以悲至撫膺泣
盡而繼之以血顧惟不肖文質無所底蓋困於衣食迫
於饑寒依隱易農所志不過鐘庾久為尺板斗食之吏
以從皀衣黑綬之役非有奇才絕學雄略高謨吐一言
可以匡俗振民動一議可以固邦興國全璧歸趙飛矢
救燕偃息藩魏甘卧安郢腦日逐髓月支擁十萬而橫

行提五千而深入將使執圭裂壤功勒景鐘錦繡為衣
朱丹被縠斯大丈夫之志非吾曹之所能及已直以章
句小才蟲篆末藝含吐絅縹之上翩躚蹲俎之側委曲
同之緘縷繁碎譬言之米鹽孰致顯榮何能至到加性疎
澁拙於進取未嘗去來許史遨遊梁竇俛首脅肩先意
承旨是以三葉靡遘不與運并十年未徙孰非能薄及
除舊布新清晷方旦抱樂銜圖訟謳有主而猶限一吏
於岑石隔千里於泉亭不得奉板中涓預衣裳之會提

戈後勁廁龍豹之謀及其投効歸來恩均舊隸升文石
登玉陛一見而降顏色再覩而接語言非藉左右之容
無勞羣公之助又非同席共研之夙逢筭餌卮酒之早
識一旦陪武帳仰文陛備聃佚之柱下充嚴朱之席上
入班九棘出專千里據操撮之雄官參人倫之顯職雖
古之爵人不次取士無名未有躡景追風奔驟之若此
者也蓋基薄牆高塗遙力蹠傾巒必然顛匱可俟竟以
福過災生人指鬼瞰將均有器有驗傾危是以不能早

從曲影遂乃取疑邪徑故司隸懷懷思得應弦譬縣厨
之獸如離繳之鳥將充庖鼎以餌鷹鶲雖事異鑽皮文
非刺骨猶復因茲舌杪成此筆端上可以投畀北方次
可以論輸左校變為丹赭充彼春薪幸聖主留善貸之
德紓好生之施解網祝禽下車泣罪愍茲恚詬憐其觳
觫加肉朽齒布葉枯株輟薪止火得不銷爛所謂還魂
斗極追氣泰山止復除名為民幅巾家巷此五十年之
後人君之賜焉木石感陰陽犬馬識厚薄員首方足孰

不戴天而竊自有悲者蓋士無賢不肖在朝見嫉女無
美惡入宮見妬家貧無苞苴可以事朋類惡其鄉原耻
彼戚施何以從人何以徇物外無奔走之友內乏強近
之親是以構市之徒隨相媒蘖及一朝捐棄以快怨者
之心呼悲可矣蓋先貴後賤古富今貧季倫所以發此
哀音雍門所以和其悲曲又迫以嚴秋殺氣具物多悲
長夜展轉百憂俱至況復霜銷草色風搖樹影寒蟲夕
叫合輕重而同悲秋葉晚傷雜黃紫而俱墜蜘蛛絡幕

熠熒爭飛故無車轍馬聲何聞鳴雞吠犬俛眉事妻子
舉手謝賓遊方與飛走為隣永用蓬蒿自沒愴其長息
忽不覺生之為重素無一廛之田而有數口之累豈曰
飽而不食方當長為傭保糊口寄身溘死溝渠以實螻
蟻悲夫豈復得與二三士友抱接膝之歡履足差肩擣
綺縠之清文談希微之道德唯吳馮之遇夏馥范或之
值孔嵩愍其留贅憐此行乞耳儻不以垢累時存寸札
則雖先犬馬猶松喬焉去矣何生高樹芳烈裁書代面

筆淚俱下

答江琰書

猥惠嘉音用蠲疾首發函伸紙朗若披雲等嶰谷之清
音比洞庭之高曲辭則美矣而擬其非倫譬言享海鳥以
醇醪嘉膳棲林枕以崇楹曾拱苟非其實立有驚怖況
復以一離訴棄賓實淮然豈復能使一筭可輕八厨斯
引且登清漢乍棄黃汙望影析支爭塗再楫其或蹲林
卧石籍卉班荆不過田畯野老漁父樵客酌醴焚枯鳴

嗚相勞羨美藜含糗果然滿腹寧有幡旗貴客車馬大賓
獻書盡先賢之德作頌罄前皇之美豈不俯拾青紫坐
享大夫况復詠高梧而賦修竹背清淮而遊長苑留東
閣以從容登石室而高視豈與夫身沒名墮同年而共
毀譽哉

與陳居士書

雲波遙蔓燕越數千行雲欝衡征禽難使用隔巾車未
能搦札引領南望悵矣心飛幸因劣薄懷章貴壤依然

谷口覺子真之咫尺靜睇巖灘信子陵之非遠已入虛白之室用披蓬蒿之徑稟紛綸之高論承希微之妙旨虛往實歸用祛塵惑

序

詹事徐府君集序

君稟靈川岳懸精辰象早照圭璋夙表岐嶷孝睦天稟友愛冥深故以事顯家庭聲著同族年十八見召為國子生曳裾持卷寔華庠壁有均閉戶靡因餘竈每攝齊

函丈左右屬目蓄以鄰幾之性加以入神之資聞一知
二師逸功倍遊魏闕而不殊江海入朝廷而靡異山林
未嘗投刺權門驅車戚里遨遊梁董去來賈郭時春秋
猶少人爵未崇而清風嘉譽震灼朝野非直俯致貴仕
故可坐享通侯而縹馬懸車閉門高枕恥為詭遇試此
行藏及皇運聿興重氣載廊君藏器待時合猶符契陵
扶搖而高鶩排闔闔而容與故位隨德顯任與事隆重
以姿儀端潤趨眄淹華寶佩鳴風豐貂映日從容帷扆

綽有餘輝自綢繆軒陞十有餘載溫樹靡答露事不訓
省中之言無漏席下之述不疑故以主聖臣賢應同堙
靈以石投水如鱗縱壑行稱表綴言成模楷猶復忘彼
豐渝安茲素薄衣同屢補食等三杯車服不事鮮明室
宇畏其雕彝九德無遺百行備舉至於專心六典精躋
必深汎遊羣籍菁華無棄搦札含毫必弘靡麗摛綺縠
之思鬱風霞之情質不傷文麗而有體

臨海伏府君集序

袁粲領袖一時儀形物右聲逾裴樂譽出王劉士有懷
道蘊義望塵而趨者或三年而未識乍四旬而一見與
君道合神遇投分披衿敷文研理匪晨伊暮至於神經
怪牒綠筭丹筒金版玉箱錦文緹帙並藏諸靈府秘在
瑤臺而君莫不徧探冥曠具閱局檢常以前賢往學亟
與聖違賈馬盧鄭非無紕越苟郭何王彌多躰謬二義
可辨未值高卿之疑九事非難不逢平叔之間其詩賦
銘誄所作猶多

碑

中寺碑

夫玉律追天故躡次之期不變緹室候景則發歛之氣
罔踰是以忘言種覺絕累於後心寄像聲形啟機於前
教兼真假之雙燭均空有而兩忘蘊三明而過十地圓
萬行而包四等道周百億化起大千獎導羣有滋濡萬
類是用發廣大心吐微妙理將同商主取喻醫王開方
便門示真實相固以濯之慈水銷以慧刀永言六趣用

均一子中寺者晉大元五年會稽王司馬道子之所立
也斜出旗亭事非湫隘傍超壁水望異狹斜天監十五
年上座僧慈等更揆日禘架赫然霞立信以填金可埒
引繩斯擬寫妙金樓模麗瓊閣岩堯偃蹇故三休而可
至竚察周流方中宿而斯盡萬楹百拱合沓相持繡枕
玉題分光爭映燭龍夭矯將舉復還威鳳鏗鏘如鳴更
戢旁攀縷檻斜登鉏砌煜爚金鋪玲瓏綺構無風自響
不拂而淨耽耽肅肅信息心之勝地穆穆愔愔固忘想

之嘉所銘曰

玄黃雖弭權輿未測生滅相輪成壞不極篋蛇爭赴藤
鼠無息情塵莫捨心火方赫是用三明寔開五力湛寂
無方示現多所蹠躅吉樹殷勤禪渚斯道誰匡蒸哉我
王施榆寶鉢供等檀牀蕭宮改構梵宇方壯階飛瑞采
地起泥香日流閃爍風度清鏘道踰厥極固與天長

栖玄寺雲法師碑

渺渺大家茫茫真樸多倫愛有莫辯塵測猗歟息心言

高理邈居之匪絢得之靡學刻情幾種厲想玄覺且說
且定以披以握來遵北渚至休西岳西岳義義北渚迴
波庭棲弱羽簷挂輕蘿甘麋衣惡棄厚安薄滅意囂湫
寄心寥廓

墓誌銘

豫州墓誌銘

自姬發系因魏傳緒留路在趙名賢世襲相秦將漢英
雄係踵忘寵辱無溫喜靡矜夸慎嗜欲其行軍用武勲

合竒正乃治邊御衆威裕兼行常懔懔然以中原為已任或欲十萬而橫行乍思五千而深入尅反舊京飲馬函渭然後高卧閒惟晤言空谷思魯連之辭賞慕田疇之高蹈而火傳川逝長途已迫雖景鐘良史有功必書刻板鏤石宜兼不朽銘曰

高勲鵠鵠長旌高旆入作爪牙出司襟帶民謠不息王言有會功為上等政稱九最日隆寵秩方登遠大義轡難留濛水易收祕丘玄戶杳杳悠悠

傳

太常敬子任府君傳

心一物之不知惜寸陰之徒靡下帷閉戶投斧懸梁雖
玄晏書淫丈勝經溢康成之忽忘所往公叔之顛墜硎
屹無以異也若夫天才卓爾動稱絕妙辭賦極其精深
筆記尤盡典實若聞金石似注河海少孺速而未工長
卿工而未速孟堅辭不逮理平子意不及文孔璋傷於
健仲宣病於弱其有集論借書窮文質之敏駐馬停信

極亹亹之功莫尚於斯焉君職等曹張聲高左陸時乃
高闢雪宮廣開雲殿秋窓春戶冬燠夏清九醞斯浮百
羞並薦雲銷月朗聿茲遊客朋來旅見辭人才子辯圃
學林莫不含毫咀思爭高競敏乃整袂端襟翰飛紙落
豪人貴仕先達後進莫不心服貌慚神氣將殫顧余不
敏廁夫君子之末可稱冥契是為神交二三君子唯以
從游日暮亭號昭仁庶子雲咫尺康成斯在借此嘉言
將無絕乎千載

誄

從子永寧令誄

余之從子謙字幼光以昭陽紀歲遊賓旅月啟足閩嶺
暝目泉岫是殲才子實喪俊民若其孝親睦友故非天
墮地出異才絕學如有鬼告神授玉懷瑕而可指桂含
蠹其取傷孰與九德彰於造次百行動為表徵一作綴吐

論含毫宣赴鐘琯標心用已懸符矩獲惠響棲道清心
可鏡和而靡屈簡而周爽邃若凝雲潔如止水無慙座

右不愧屋漏蒼苔繞路素塵蒲席蕭索庭戶靡事鮮明沉淪典籍將絕弔賀室如夏甫狀等安期所有清塵唯不能忘懷藝而已斯美宜久宜長而驥驥之步中徂鸞驚之趨未矯一歸寥廓長反虛無雖東隅再暝鉗丙之御無及北顧相望隸首之數不盡而怛化非常人所不免况風雲萬里間此山川客思故鄉次房之念何極輕棺反蜀允南之思可知而魂兮渺渺扁舟靡靡人生之望已冥死歸之期又阻痛心傷目豈伊一事無以少寄

辛傷故復誄之云爾

昭昭洪宵映策光書違羸避項從衛遷徐基忠踐孝抱
約懷虛有顯而默匪屈伊舒如茲邴魏譬彼董踈入登
高闕出啟精廬瞻星畫野望闔推車履仁不匱蹈道有
餘九世盛矣七葉光諸往弼膚主來傅英儲峨峨三祖
羅室并居前瞻紫闕傍望白渠高軒霞被四馬龍轡溫
溫司武皎皎秘書義高松竹價重璠璵元昆世父重規
疊矩容與學丘徘徊詞府青紫已拾大夫斯取盛藩往

相名畿來撫暉光不已驚生之子謾謾萬尋昂昂千里
寶鳳匪雜真龍非似均情邃寧得意莊李室有虛白門
無囂淳遺心沮勸忘懷溫喜貧靡斯攝富其無恥險而
不峭方而能理德有潤身學斯為已逸羽難集孤峰易
峙南邁瑤琨西踰杞梓人亦有言名為實使譽傾邦國
價騫州里崇蘭自芬玗玉自光汪汪巨壑曖曖重牆靡
造靡請不迎不將久而愈敬狎而愈莊即無矯資此有
循常默非蓄短顯弗用長豈伊墜岸如彼懸梁唯學已

聚待問則強偏在三筮兼下五行亦稅其巾於彼王吏
如龍宮楚有斯內侍蘊此上才安茲下位諸庶始闢傳
府初開爾其戾止辟彼昔才從師簡帝仍此追陪何以
關

自茲翰飛傍佐戎列來攝儒衣儒衣濟濟訪對斯
歸是義罔惑唯禮無違悠悠越嶂泱泱闔海薄言銅墨
蒲密斯在孰云識吏政均舊宰循猛是薰絃常無怠補
袍方服治情莫改增貲匪課歸民自倍十郡為則百城
斯採化日未逢政稱異等斯痛斯傷喪善殲良妖同武

擔疾甚清漳闔棺陋邑掩櫬蕪鄉嗚呼哀哉眇眇輕艤
悠悠長塗風生閭闔日去昆吾空歸故國寧識舊都水
鳴秋鶴岸集寒鳥寒不夜哭唯獨呱呱茫茫大塊杳杳
玄墟嗚呼哀哉伊吾與爾大別唯名肥泉猶接爪ستان
輕義雖子道思實友生歡憂共日險泰均情如菊有芬
如蘭有薰別唯慕類居實呼羣盡日持論遙夜披文漸
漬羲老祖述淵雲唯昏及旦自旭徂曛人道實難譬被
徂湍驅車嶧嶧執手河干三川縈薄七嶺悠漫自茲不

見心壁言迴瀾歲佇會面日望音翰歡無一緒悲有萬端
蒙陰遽戢扶景易殘即斯大暮為此一棺山足難曉壘
首易寒秋蟲相叫暮羽來搏宿草行沒宰樹方攢昭塗
長已大夜斯安孰知冥默徒此汎瀾嗚呼哀哉

祭文

祭禹廟文

惟帝稟圖上昊貽則下民五聲窮聽四乘兼往輕璧惜
景既捨冠履愛人忘我不顧胼胝下車以泣事深罪已

憑舟靡懼義存拯物盛業方來遺神如在愛被昆蟲理
有好生之德事安菲素固無厚味之求是用黍稷非馨
頻繁以薦克誠斯享憑心可答

佛事文

禮佛唱導發願文

夫至覺玄湛本絕聲言妙慮虛通固略筌象雖事絕百
非而有來斯應理亡四句故無感不燭皇上道照機前
思超繫表凝神汾水則心謝寰中屈道軒丘則形勞宇

內斯乃法忍降迹示現閻浮之境大權住地俯應娑婆
之域故欲洗拔萬有度脫羣生濯淨水於寶池蔭高枝
於道樹折伏攝受之仁遇緣而咸拯苦言軟語之德有
感而斯唱日用不知利益莫限衆等相與增到奉逮至
尊五體歸命敬禮云云仰願皇帝陛下至道與四時並
運玄風與八埏共廣反淳源於三古捨澆波於九代至
治已覩於今日大道復屬於此時虎豹蹈而不驚虺蛇
蹤而莫噬埋金城玉毀契焚文嘉禾生釀泉出金車玉

馬自相暉曜元鶴丹鳳飛鳴來往光景之所照燭舟車
之所驅汎若不屈膝係頸迴首革音入侍藁街迎拜渭
水與天地而長久等金石而逾固中岳可轉長河有清
而我聖皇愈溫愈粹不言而化行無為而教肅

夫道備監撫望表元良察遠知微貫宗勾極不勞斧藻
無待審諭况復靜悟空有同觀貞俗能行能說既信既
持衆等齊誠奉逮儲君殿下歸命敬禮云云仰願皇太
子殿下厚德體於蒼莽廣載侔於磅礴前星照曜東離

煥炳淑聞自遠和氣熏天異才爭入端人並至玉體怡

清金聲妙越

夫茂實英聲道周德廣秉珪襲袞之貴坐槐憇棠之尊
猶應其惜東瞰俱吝西嶮悟蕉蘆之非實知鏡月之虛
銜信秉電之不留黔畫水之隨合惟宜照之智炬灌以
寶瀾增此膚根成斯妙植又各增到奉逮太尉等諸王
殿下歸命敬禮云云仰願諸王既明且哲聲跨於河楚
令聞令望道均於旦奭德貫右戚義藹周親作鉉則與

二曜相終臨岳則與四維等固若彭涓之遐永譬松筠
之貞悅

夫天枝峻密帝葉英芬莫不玉震蘭搖金鏘桂縟覩寸
丈而驗錦觀一毛而測鳳並能才高銅爵詞富雲臺彬
彬亹亹超超灼灼以斯勝善奉逮諸王殿下歸命敬禮
云云仰願諸王殿下穆穆與清風並扇英英將白雲共

朗永鍾清祉長享元吉出牧則聲高民上入朝則譽光
物右德重山王智超海藏鏗鏘麗於珠樹皎鏡光於玉

田

夫道流雲幄德感椒闈必以前藉勝因宿稟嘉數況重

霑法雨更披慧日雖異姜后解珥請罪於周王不待樊

姬捨肉有激於荆后而遵恭儉去嗜欲拚彤璣撤靡麗

了心不滯正見無疑衆等齊誠奉為六宮眷屬歸命敬

禮云云願六宮眷屬業華姬日聲麗媯辰震彩鑄圖傳

芳詩史位齊寶印行等月光具六神通得四無礙

夫稟閎明之德懷深妙之心豈非修習有本故能依止

無倦義興等諸公主志斯華重其此翹到並宿世之所
記別故現前所以信了影響至真寤寐玄極人各增到
仰為諸公主歸命敬禮云云願諸公主日增智性彌長

慧根四攝四依已遵已蹈七善七定靡退靡輟盛此王
姬光茲帝女長享湯沐與河山而同固永服緹綺貫寒
暑而無窮

夫三相雷奔八苦電激或方火宅乍擬駛河故以尺波
寸景大力所不能駐月御日車雄才莫之能遏其間飲

苦餐毒抱痛銜悲身口為十使所由意思乃八疵之主
衆等相與彼我齊到懺悔業纏無始已來至於今日所
為十惡自作教他見善不讚聞惡隨善焚林涸澤走犬
揚鷹窮鄭衛之響極甘旨之味戲笑為惡倏忽成非侮
慢形像陵踐塔寺不敬方等毀離和合自定權衡棄他
斗斛愧心負理昧主欺親雖七尺非他方寸在我而能
性其情在人未易恣此心口衆罪所集各運丹怨五體

自投歸命敬禮

云

願現前衆等身口清淨行願具足

消三障業朗三達智五眼六通得意自在

懺悔禮佛文

夫有非自有有取所以有無非自無無著所以無故有
取之惑興倏成萬累無著之念起一超九劫是知道之
所貴空有兼忘行之所重真假雙照稟氣含靈莫聞斯
本肖形賦影靡測由來故發茲識窟猶綿蒙其莫辨尊
此愚相尚窈冥而未悟茫茫有同暗海幽幽實在危城
業風繁薄三有長鶩惑水遭迴二死相屬以苦捨苦從

暗入暗尋本不離色心即事莫非生滅是用抱此纏蓋
輪迴生死恣其六愛興其八邪或粗詐而克昌乍仁義
而溘死或才均智等此賤彼豪或共日並時人升我墮
唯言報施寂寥不知因對皎徹曩緣今果遇現殖成有
如符契不謬毫髮而欲以促生運其長術浮命迴其冥
數當知剎那交謝瞬息不留東轉纔吐西崦已仄譬閱
川之駛流若棲葉之輕露偽城易弛毒樹自攻若非假
實兩明真俗俱辨豈能寫誠迴向刻意修習不退不沒

愈堅愈固南平大王殿下含辰象之正氣畜海嶽之淳
靈宿侍八恒早遊七覺藉妙因於永劫招勝果於茲地
若真金之愈鑿美玉之載琢是用未積已散不藏而捨
故今式招靈指仰屈神儀建此齊肅譬茲闔楗威來繙
素濟濟洋洋名香遍室寶華覆地高梵宛轉寧止震木
遏雲清桴遙奕非直騰魚御馬仰願四部至誠五體歸
命東方云云願大王殿下五畏內遣十力外扶百福莊
嚴萬祉周集愕夢無忤其慮甘寢有恬其神更闢寶衢

愈興慧業

夫玄極凝淡非學者所窺妙本難思豈行人能測是以
十地云覩有羅縠之疑三乘稱見懷狂羊之惑自非鑒
窮機覺照極冥虛窮理盡性體元含一安能濟世仁壽
拯物阽危道包碧海聲高赤縣昔堯曜唯在即世舜黑
不兼來果四巡疲於禹迹六事倦於湯身並域中之勤
勞方內之成益豈有度元元於苦海拔冗冗於畏途運
神刀震法吼冤香城之妙理窮金河之奧說慧高龍樹

智出馬鳴必欲洗濯臣民獎導緇白衣覆地養水產陸

生咸降慈悲悉蒙平等奉為皇帝陛下儲君太子歸命

敬禮云云

仰願皇帝陛下景祚與七政相齊皇基與二

曜均永地平天成樂和禮洽玉燭道正氤氳無爽條風

祥雨膏潤相屬却馬偃伯鑄戟銷戈南泊北臨西被東

漸灑甘雨布慧雲唯繩可結在冠已盡唐哉皇哉為尊

為首又願皇太子殿下膚業清暉與貞明而並燭粹範

溫儀從嵩霍而俱峻聲出姬誦道越漢莊永沐智水長

照慧日上妙居身至仁在已自雙樹八枝潛光匿曜寶
城不闢慧扇方掩而聖后駕法輪於長路棹寶舟於遙
壑道浹人祇福隆祧蟬肅事園寢虔奉宗祏藉斯妙果
奉逮七廟聖靈歸命敬禮云云仰願重明累聖優然如
在騰神淨國總駕天宮託化金蕖遨遊寶殿

夫誠心內惻則至覺如在形力外殫則法身咫步衆等
相與增到為諸王兄弟妃主戚屬歸命敬禮云云願諸
三殿下裂壤盛於諸姬磐石過於隆漢德高魯衛義重

間平論道則百辟依風作翰則羣黎仰化弘闡至教紹
隆季像第內少長並膺此多福若百華之春麗譬萬寶
之秋成信解堅深翹向無怠

夫小乘志劣事唯一已大士意均乃包六趣今日檀主
信等明珠無勞傍鏡質同挺玉不待外光常欲物我均
心怨親等觀衆等各歸誠為二十八天四王釋梵人間
貧病地獄辛楚敬禮尊儀靈像菩提寶塔云云大乘與
藏妙法深經大身無邊身大力無量力四向四果八賢

八聖願六氣氤氳四序熙穆至治光萬宇文化洞九幽
襲介披鱗濕生卵化八苦六窮三塗五道俱蒙惠利並
識遵依刀林輶及劍樹搖險迷域開道直指四衢闇室
生明大啟三曜俱向道場同登種覺

初夜文

夫遠自無始至於有身生死輪驚塵轉莫之比明暗逼
來薪火不能譬逝水非駛千月難保蓼蟲智苦桂蠹喜
甘大睡劇於據梧長昏甚於枕麌義非他召事實已招

曾不知稟此形骸所由而至將斯心識竟欲何歸唯以
勢位相高爭驕華於一旦車徒自盛競馳騖於當年莫
不恃其雄心壯齒紅顏綯髮口恣肥醜身安輕靡繁絃
促柱極滔漚而不厭玉牀象席窮靡曼而無已謂悲泉
若木出沒曾不關人蹲烏顧兔升落常自在彼殊不知
命均脆草身為苦器何異犬羊之趣屠肆麋鹿之入膳
厨秋蛾拂燄而不疑春蠶繫絲而靡悟未辨先對不識
因習及其一觸畏途孟門非險轢裂肢解方斯不臻其

痛斷趾鑿肩比茲未極其苦輪迴起伏杳杳悠悠是以
天中之天降悲提引壅夏河之長瀉撲秋原之猛燎或
同商主乍等醫王形遍三千教傳百億或恣其神力或
寂諸梵境言則三塗離苦笑則四生受樂乃應病投機
解紛說理制之日夜稱為八關以八正鑰為法關捷斯
實出世之妙津在家之雄行眾等相與運誠奉逮南平
王殿下歸命敬禮云云仰願大王殿下睿業清暉與南
嶽而相固貞心峻節等東溟而共廣萬累烟消百災霧

滅巧幻所不惑彊魔莫能燒逐慘舒而適體隨暄涼而
得性自稟儀天之氣永固膳衛之道得六神通力具四
無礙智夫日在昆吾則慮繁事擾景落濛汜則神靜志
怡壁月珠星含華相照輕雲薄霧朗然自戢鳴鐘浮響
光燈吐輝法幢卷舒拂高軒而徐薄名香郁馥出重檐
而輕轉金表含映珠柱洞色況復天尊端凝威光四照
煥發青蓮容與珂雪覺祇衛之咫尺若林園之斯在大
招離垢之賓廣集應真之侶清梵含吐一唱三嘆密義

抑揚連環不輟南平王體得機之敏資入神之微抱德
含和經仁緯義善無細而不窮累有輕而必捨受同虛
籥照如懸鏡忘魯衛之尊高略彬萼之華重建希有之
勝席臨難遇之法場相與五體歸命敬禮云云仰願大
王殿下入不二門登一相道德階不動智超遠行洋溢
惠聲與八風而共遠優游玉體等六律而相調餐雪山
之良藥挹露城之甘味袞服瓊珪與四時而永久朱輪
緹幟貫千祀而常然。

樂府

朱鷺

因風弄玉水映日上金堤猶持畏羅繳未得異鳧鷺聞
君愛白雉兼因重碧雞未能聲似鳳聊變色如珪願識
昆明路乘流飲復棲

鼓瑟曲有所思

夜風吹熠燿朝光映昔耶

昔耶瓦松也一作辟邪

幾銷糜蕪葉空

落蒲桃

一作

花不堪長織素誰能獨浣沙光陰復何極

望促反成賒知君自蕩子柰妾亦倡家

白馬篇

千里生冀北玉鞘黃金勒散啼去無已搖頭意相得豪氣發西山雄風擅東國飛輶出秦隴長驅繞岷棘承謨若有神稟筭良不惑澯汨河水黃參差嶂雲黑安能對兒女垂帷弄毫墨兼弱不稱雄後得方為特此心亦何已君恩良未塞不許誇天山何由報皇德

古意

青絲控燕馬紫艾飾吳刀朝風吹錦帶落日映珠袍陸
離闊右客照耀山西豪雖非學詭遇終是任逢遭人生
會有死得處如鴻毛寧能偶雞鶩寂寞隱蓬蒿

登高臺

試出金華殿聊登銅雀臺九路平如掌一作砥

千門洞已

開軒車映日過簫管逐風來若非邯鄲美便是洛陽才

湘夫人

桂棟承薛帷眇眇川之湄白蘋徒可望綠芷竟空滋日

暮思公子銜意嘿無辭

詩

侍宴

麗景屬春餘清陰澄夏首交枝隱脩逕迴流影遙阜徒
惟轡輕筠移鑾拂高柳去矣勞茂績勉哉報嘉誘小臣
良不才涓塵愧所守何用勝雕斲璧言木良如朽

又

迴輿避暑宮下輦迎風館散漫輕烟轉霏微商雲散蔓
次之日車金書

草亘巖垂高枝起天半回風稍驚水落光漸斜岸妙儻
駐行雲清歌入層漢眸顏暢有懌德音良已粲

落日登高

憑高且一望目極不能捨東北指青門西南見白社軫
軫河梁上紛紛渭橋下爭利亦爭名驅車復驅馬寧訪
蓬蒿人誰憐寂寞者

中川長望

長川杳難即四望四無極安流寧可值憤風方未息危

帆渡中懸孤光巖下是岸際樹難辨雲中鳥易識莫恨
東復西誰知迂且直故鄉相思者當春愛顏色獨寫千
行淚誰同萬里憶

贈顧倉曹

洛陽十二門樓闕似西崑曠曠不思下相望隔畫垣畫
垣向阿閣棲鳳復棲鴛五曹均趨奏六尚等便煩朝爐
何馥馥夜錦有餘溫日中驅上駟驤首遍京宛晨趨魏
公子夕宿韓王孫夙昔今何在生平無不論譬如裝施

草心謝葉空存誰復三乘曉獨念九飛魂

秋日愁居答孔主簿

首秋雲物善晝暑旦猶清日華隨水汎樹影逐風輕依
簾野馬合當戶昔耶生物我一無際人鳥不相驚儻過
北山北聊訪法高卿

至牛渚憶魏少英

楓林暖似畫沙岸淨如掃空籠望懸石回斜見危巖綠
草閑遊蜂青葭集輕鶴徘徊洞初月浸滛漬春潦非願

歲物華徒用風光好

寄何記室

思君不得見
望望獨長嗟
夜風入寒水
晚露拂秋花
何由假日御
暫得寄風車

忽不任愁聊示固遠

去秋客舊吳
今春投故越
淚逐東歸水
心挂西斜月
未應歲貶顏
直以憂殘髮

為何庫部舊
姬擬蘿蔓之句

出戶望蘭薰褰簾正逢君歛容裁一訪新知詎可聞新人含笑近故人含淚隱妾意在寒松君心逐朝槿

何生姬人有怨

寒樹棲羈雌月映風復吹逐臣與棄妾零落心可知寶琴徒七絃蘭燈空百枝顰容不足效啼妝拭復垂同衾成楚越異國非仳離

為人傷近而不見

羸女鳳凰樓漢姬柏梁殿訖勝仙將死音容猶可見我

有一心人同鄉不異縣異縣不成隔同鄉更脈脈脉如牛女何由得一語

月夜詠陳南康新有所納

二八人如花三五月如鏡開簾一種色當戶兩相映重價出秦韓高名入燕鄭十城屢請易千金幾爭聘君意自能專妾心本無競

詠擣衣

足傷金管遠多愴緹光促露團池上紫風飄庭裏綠下

機驚西眺鳴砧遠東旭芳汗似蘭湯雕金辟龍燭散度
廣陵音摻寫漁陽曲別鶴悲不已離鸞斷還續尺素在
魚腸寸心憑鴈足

與司馬治書同聞隣婦夜織

洞房風已激長廊月復清鵠鵠夜庭廣飄飄曉帳輕襯
聞百蟲思偏傷一鳥聲鳥聲長不息妾心復何極猶恐
君無衣夜夜當窓織

為人述夢

工知想成夢未信夢如此皎皎無片非的的一皆是以
親芙蓉褥方開合歡被雅步極嬌妍含辭恣委靡如言
非倏忽不意成俄爾及寤盡空無方知悉虛詭

侍宴景陽樓

金鋪爍可鏡桂棟儼臨雲沾觴均飲德服道驗朝聞記
論禹無間非恥堯為君小臣亦何者短翮屢追羣

春日寄鄉友

旅心已多恨春至尚離羣翠枝結斜影綠水散圓文戲

魚兩相顧遊鳥半藏雲何時不憫默是日寢思君

夜愁示諸賓

簷露滴為珠池水合成璧萬行朝淚瀉千里夜愁積孤
帳閉不開寒膏盡復益誰知心眼亂看未忽成碧

送殷何兩記室

掩袖出南浦驅車送上征飄飄曉雲駛養養旦潮平不
肖余何惜無貲爾勿輕倘有還書便一言訪死生

春閨怨

愁來不理鬢春至更攢眉悲看蛺蝶粉泣望蜘蛛絲月
映寒蛩風吹翡翠帷飛鱗難託意駛翼不銜辭

秋闌怨

斜光隱西壁暮雀上南枝風來秋扇屏月出夜燈吹深
心起百際遙波非一垂徒勞妾辛苦終言君不知

詠寵姬

及君高堂還值妾妍妝罷曲房褰錦帳迴廊步珠庭玉
釵時可挂羅襦詎難解再顧連城易一笑千金買

在王晉安酒席數韻

窮窪宋華容但歌有清曲轉盼非無以斜眉幸相矚詎

減許飛瓊多

玉臺作絕勝

劉碧玉何因送欵欵半飲杯中醉

為人寵姬有怨

可憐獨立樹枝輕根易搖已為露可挹復為風可飄錦
食簾不開端坐夜及朝是妾愁成瘦非君重細腰

為姬人自傷

自知心裏恨還向影中羞迴持昔慊慊變作今悠悠還

君與妾扇

一作
釵

歸妾奉君裘斷弦猶可續心去最難留

為人有贈

碧玉與綠珠張盧復雙女曼聲古難匹長袂世無侶似出鳳凰樓言發瀟湘渚幸有褰裳便含情寄一語

見貴者初迎盛姬聊為之詠

久想尊房麗未見傾城者千金訪繁華一朝遇容冶家本薊門外來戲叢臺下長卿幸未匹文君復新寡

傷乞人

少年空扶轍白首竟填溝
葦席何由足菽藿不能周
自顧非好乞行且欲包羞勞君欵曲問冒此殷勤酬

春思絕句

雪罷枝即青冰開水便綠復聞黃鳥聲全作相思曲
為徐僕射妓作

日晚應歸去上客強盤桓稍知玉釵重漸見羅襦寒

欽定四庫全書叢要卷一萬九千六百八十五

集部

漢魏六朝百家集卷九十三

明 張溥 輯

陸倕集

賦

感知己賦

夜申旦而不寐獨匡坐而怨咨命僕夫而夙駕指南館
而為期學窮書府文究辭林既耳聞而存口又目見而

登心似臨淄之借書類東武之飛翰軫工遲於長卿踰
巧速於王粲固乃度平子而越孟堅何論孔璋而與公
幹或欲涉其涯涘求其界畔則浩浩港港彪彪洋洋譬
長鈇於鞘中若龍淵與蜀漢濟濟冠蓋祁祁儻逸有竊
風以味道咸交臂而屈膝或望路以窺門空升堂而入
室彼春蘭及秋菊尚蕪絕於衆芳矧重仁與襲義信遼
遼兮未央言追意而不逮辭欲盡而復忘竊仰高而希
驥忽脂車而秣馬既一顧之我隆亦東辟之余假似延

州之如舊同伯喈之倒屣附蒼蠅於驥尾託明鏡於朝
光謂虛無而為有布籍甚於游揚於是柔條颯其威勁
白露變而為霜歲忽忽而道盡憂與愛兮未忘聚落莖
於虛室聽羈雀於枯楊憇鬱悒其誰語獨撫抱而增傷
託異人以蠲憂賴奇文而愈疾索黃瓊之寄居造安仁
之狹室車出門其已歡無論銜枯與促膝譬鄒子之唶
松故未寒而能慄徒納壤以作高陋吞舟而為網值墨
子之愛兼逢太丘之道廣陪九萬以齊征激三千而同

上識公沙於杵臼拔孝相於無名非夫人之為感孰云
感於余情指北邙以作誓期鬱鬱於佳城

思田賦

歲聿忽其云暮庭草颯以萎黃風颶颶以吹隙燈黯黯
而無光獨展轉而不寐何增歎而自傷於是踟躕徙倚
顧景興懷覩煢煢以至曙綴予想於田菜彼五畝其馬
在乃爰泊乎江隈出郭門而東騫入漸浦而南迴爾乃
觀其水陸物產原隰形便林藪挺直丘陵帶面臨九曲

之迴江對千里之平甸風去蘋其已開日登桑而先見
聽啁哳之寒鷄弄差池之春燕臨場圃以築館對櫨軒
而鑿池集游泳於階下引朝派於堂垂瞻巨石之前却
玩激水之推移雜青莎之霏靡拂細柳之長枝感風燭
與石火嗟民生其如寄苟有胸而無心必行難而言易
幸少私而寡欲兼絕仁以棄智忽學步而學趾又追飛
而厲翅瞻鹿苑而竊高仰疆臺而慕義歷四時於逝水
馳三稔於申臯望歸流而載懷情鬱悒其何寘

賦體

奉欽明之睿后沐隆平之玄化參振鷺之充庭侍長徒
之曾舍冀無恨於終南豫告成於芝駕雖就列而陳力
終胡顏於長夜

表

為豫章王慶太子出宮表

臣聞周固本支寔資明兩漢啟磐石必係元良所以闡
弘祚鴻光崇守器伏惟皇太子道契生知照均天縱不

藉審諭之功無待溫文之輔而冬書秋記夙表睿資春
誦夏絃幼彰神度雖復直門守令長壽察微魏贊多容
漢稱寃博不足以連輝茂則匹景令圖甲觀惟新桂宮
告始朱班徙次翠蓋移陰華裔式瞻人祇蹈舞

除詹事表

中陽白水徒庇微軀送珥抱薪未眷成績陳席不棄故
餽無遺遂宣時髦升降清顯尊官厚秩無因而至陋巷
草門鬱成爽塏儲端華重實異恒司南章馬宮已擇儒

雅寶嬰許商爰取姻戚自茲已降名器日隆歷選才賢若何叨越

拜吏部郎表

銓衡庶品歷選賓寮阮咸貞素屢薦未登陸亮忠心裁居拜職自非季重清識李毅恬正則何以區分管庫式鑒胥史

為王光祿轉太常讓表

昔者楚德方盛孫叔濯衣漢道克隆王陽結綬故拜命

無辭受爵不讓况宗卿清重歷選所難漢晉以降莫非
素範辭爵則桓郁張奮讓封則丁鴻劉愷潘尼之文雅
深純華表之從容退默自此迄茲風流繼軌以臣况之
曾無等級

為張纘謝兄尚書謚靖子表

亡兄夙構皇慈早邀靈慶立言著績未酬天寵門衰祚
寡遽辭昌運拊心摧恨私懷罔極日月告時幽埏浸遠
王人猥集佳冊光臨榮溢里庭恩深松櫟

章

授潯陽太守章

鏤冰雕脂不見大龍之象課虛叩寂寧聞駕辯之音徒
荷容蓋空班推擇不能使府庭生梓橫閣誦經俯睨朱
輜仰瞻繒蓋漏上嚴辨伏軾多慙

教

為豫章王拜後赦教

夫義獄緩死著在令圖疑罪惟輕聞之雅誥是以虞經

惻隱流涕冬決鍾意垂仁哀吟寒送吾以虛薄夙頒寵
章光宅襟險奄有全粵非有沛獻矜嚴空紓青組東平
智思徒舉赤惟思所以仰述皇猷導揚弘澤遵彼下車
譬茲解網

未至潯陽郡教

第五倫之臨會稽躬斬馬草鄧伯道之蒞吳郡自運家
糧故能使吏作頌歌民胥興詠太守薄德謬叨龜組竊
顧巴祇闇坐接客思匹吳隱被絮對賓常藥自隨式瞻

無遠單車入境竊所庶幾舊須發民治道及戍邏渝樵採諸如此類一皆省息

又

太守家本諸生伏膺典記光武靈臺之籍較涉根基張華聚土之書略見庭戶貴郡圖載其存方策校以山經參諸括象原野城寺宛在心目龍泉鶴嶺不易窮登所撰郡圖可勿親用公孫陛戟既似井蛙延壽執戈實同兒戲

書

與徐僕射薦沈峻書

五經博士庾季達須換計公家必欲詳擇其人凡聖賢可講之書必以周官立義則周官一書實為羣經源本此學不傳多歷年世北人孫詳蔣顯亦經聽習而音革楚夏故學徒不至惟助教沈峻特精此書比日時聞講肄羣儒劉嵒沈宏沈熊之徒並執經下坐北面受業莫不服人無間言第謂宜即用此人命其專此一學周

而復始使聖人正典廢而更興累世絕業傳於學者

答釋法雲書

辱告惠示至尊所答臣下審神滅論昔者異學爭途孟子抗周公之法小乘亂道龍樹陳釋迦之教於是楊墨之黨舌舉口張六師之徒轍亂旗靡言神滅者可謂學僻而堅南路求燕北轍首楚以斯適道千里而遙聖上愍其迷途爰奮天藻鉤深致遠盡化知神俾此困蒙均斯永釋陳茲要道同彼月照弟子並以凡薄沾竊恩紀

纓冕則天之朝食捉稽古之論贊幸之誠獨知踊躍猥
頒告逮謹用書紳陸倕呈

啟

為張侍中謝啟

陳力就列不能者止實欲強飯據鞍自窮心力濡足摩
頂少報洪私徒課虛無空延鐘箭不悟爰降曲慈復叨
清顯職司近切任掌總綸魏選異才漢求高德官次恪
居鮮非民譽仰瞻內省無一可階

為息纊謝勅賜朝服啟

玄冕素帶出自禁財朱綏青綢隆於皇府輝燭鄰黨震耀街衢姻族移聽朋儕改瞻非臣隟弱所能陳報

遷吏部郎啟

臣器均濩落材同擁腫效非積山勤乖附地自叨榮秩列裁移氣序而坐延曲私遂被洪造自非割蚌識珠覩石知玉寧可以獲名理俗見操就教

謝勅使行江州事啟

封畛遐曠厔井奧實陸海神臯偏屬茲境兼以茂親明
德維翰作鎮宣述條教匡贊盛猷自非問望兼逢寧可
擢膺嘉舉

銘

新漏刻銘

夫自天觀象昏旦之刻未分治歷明時盈縮之度無準
挈壺命氏遠哉義用揆景測辰徼宮戒井守以水火分
茲日夜而司厯亡官疇人廢業孟陬殄滅攝提無紀衛

宏載傳呼之節較而未詳霍融叙分至之差詳而不密
陸機之賦虛握靈珠孫綽之銘空擅峴玉弘度遺篇承
天垂旨布在方冊無彰器用譬彼春華同夫海棗寧可
以軌物字民作範垂訓者乎且今之官漏出自會稽積
水違方導流乖則六日無辨五行不分歲躔閏茂月次
姑洗皇帝有天下之五載也樂遷夏諺禮變商俗業類
補天功均柱地河海夷晏風雲律呂坐朝晏罷每旦晨
興屬傳漏之音聽鶴人之響以為星火謬中金水違用

時乖啟閉箭異鎰銖爰命日官草創新器於是俯察旁
羅登臺升庫則于地四參以天一建武遺蠹咸和餘舛
金筒方圓之制飛流吐納之規變律改經一皆懲革天
監六年太歲丁亥朔十六日壬寅漏成進御以考辰正
晷測表候陰不謬圭撮無乖黍累又可以校運筭之曠
合辨分天之邪正察四氣之盈虛課六歷之疎密永世
貽則傳之無窮赫矣煥乎無德而稱也昔嘉量徵物盤
盂小器猶且昭德記功載在銘典况人神之制與造化

合符成物之能與坤元等契勲倍楹席事百巾机寧可使多謝曾水有陋昆吾金字不傳銀書未勒者哉乃詔小臣為其銘曰

一暑一寒有明有晦神道無跡天工罕代乃置挈壺是惟熙載氣均衡石晷正權槩世道交喪禮術銷亡遽遷水火爭倒衣裳擊刁舛次轂未乖方爰究爰度時惟我皇方壺外次圓流內襲洪殺殊等高卑異級靈虬承注陰蟲吐噏倏往忽來鬼出神入微若抽繭逝如激雷耳

不輟音眼無留眄銅史司刻金徒抱箭履薄非兢臨深
罔戰授受靡誓登降弗爽唯精唯一可法可象月不遁
來日無藏往分似符契至猶影響合昏暮卷蓂莢晨生
尚辨天意猶測地情況我神造通幽洞靈配皇等極為
世作程

石闕銘

昔在舜格文祖禹至神宗周變商俗湯黜夏政雖格命
殊乎因襲揖讓異於干戈而畧緯冥合天人啟基克明

峻德大庇生民其揆一也在齊之季昏虐君臨威侮五行急棄三正刑酷然炭暴踰膏柱民怨神怒衆叛親離躋地無歸瞻烏靡託於是皇帝拯之乃操斗極把鈎陳翼百神禔萬福龍飛黑水虎步西河雷動風驅天行地止命旅致屯雲之應登壇有降火之祥龜筮協從人祇響附穿胸露頂之豪箕坐椎髻之長莫不援旗請奮執銳爭先夏首冕固庸岷負阻協彼離心抗茲同德帝赫斯怒秣馬訓兵嚴鼓未通凶渠泥首弘舸連軸巨艦

接艤鐵馬千羣朱旗萬里折簡而禽廬九傳檄以下湘
羅兵不血刃士無遺鏃而樊鄧威懷巴黔底定於是流
湯之黨握炭之徒守似藩籬戰同枯朽革車近次師營
商牧華夷士女冠蓋相望扶老攜幼一旦雲集壺漿塞
野簞食盈塗似夏民之附成湯殷士之窺周武安老懷
少伐罪弔民農不遷業市無易賈八方入計四隩奉圖
羽檄交馳軍書狎至一日二日非止萬機而尊嚴之度
不讐於師旅淵默之容無改於行陣計如投水思若轉

規策定帷幄謀成几案曾未浹辰獨夫授首乃焚其綺
席弃彼寶衣歸璇臺之珠反諸庶之玉指麾而四海隆
平下車而天下大定拯茲塗炭救此橫流功均天地明
並日月於是仰協三靈俯從億兆受昭華之玉納龍叙
之圖類帝禋宗光有神器升中以祀羣望攝袂而朝諸
夏布教都畿班政方外謀協上策刑從中典南服緩耳
西羈反舌劖騎穹廬之國同川共穴之人莫不屈膝交
臂厥角稽顙鑿空萬里攘地下都幕南罷鄣河西無警

於是治定功成邇安遠肅忘茲鹿駭息此狼顧乃止六
樂治五禮改章程創法律置博士之職而著錄之生若
雲開集雅之館而欵關之學如市興建庠序啟設郊丘
一介之才必記無文之典咸秩於是天下學士靡然向
風人識庶隅家知禮讓教臻侍子化洽期門區宇乂安
方面靜息役休務簡歲阜民和歷代規摹前王典故莫
不芟夷翦截元執厥中以為象闕之制其來已遠春秋
設舊章之教經禮垂布憲之文戴記顯游觀之言周史

書樹闕之夢北荒明月西極流精海岳黃金河庭紫貝
蒼龍元武之制銅爵鐵鳳之工或以聽窮省寃或以布
治懸法或以表正王居或以光崇帝里晉氏浸弱宋歷
威夷禮經舊典寂寥無記鴻規盛烈湮沒罕稱乃假天
闕於牛頭託遠圖於博望有欺耳目無補憲章乃命審
曲之官選明中之士陳圭置臬瞻星揆地興復表門草
創華闕於是歲次天紀月旅太簇皇帝御天下之七載
也構茲盛則興此崇麗方且趨以表敬觀而知法物覩

雙碣之容人識百重之典作範垂訓赫矣壯乎爰命下
臣式銘盤石其辭曰

惟帝建國正位辨方周營洛濱漢啟岐梁居因業盛文
以化光爰有象闕是惟舊章青蓋南洎黃旗東指懸法
無聞藏書弗紀大人造物龍德休否建此百常興茲雙
起偉哉偃蹇壯矣巍巍旁映重疊上連翠微布教方顯
浹日初輝懸書有附委篋知歸鬱崛重軒穹隆反宇形
聳飛棟勢超浮柱色法上圓制模下矩周望原隰俛臨

烟雨前賓四會却背九房北通二轍南湊五方暑來寒
往地久天長神哉華觀永配無疆

蠡杯銘

用邁羽杯珍踰渠椀實同蠡測形均撲滿伊我疲病獨
居無伴所不此挹誰誚誰緩

墓誌銘

誌法師墓誌銘

法師自說姓朱名寶誌其生緣桑梓莫能知之齊故特

進吳人張緒興皇寺僧釋法義並見法師於宋太始初
出入鍾山迨來都邑年可五六十歲未知其異也齊宋
之交稍顯靈迹披髮徒跣負杖挾鏡或徵索酒肴或數
日不食預言未兆懸識他心一時之中分身數處天監
十三年即化於華林門之佛堂先是忽移寺之金剛像
出置戶外語僧衆云菩薩當去爾後旬日無疾而殞沉
舟之痛有切皇心殯葬資須事豐供厚望方墳而隕涕
瞻白帳而拊心爰詔有司式刊景行辭曰

欲化毗城金粟降靈猗歟大士權迹帝京緒胄莫詳邑
居罕見譬彼涌出猶如空現哀茲景像愍此風電將導
舟梁假我方便形煩心寂外荒內辯觀往測來覩微知
顯動足虛立發言風偃業窮難詔因謝弗援慧雲晝歇
慈燈夜昏

碑

天光寺碑

法雲旦聚則浸潤被乎重沙慧日晨登則暉光燭於有

頃皇帝乃把神珠握靈鏡擊天鼓撞地鐘驅日月之師
勒星辰之陣九流外籍五明內興鳥策餘文龍宮遺教
莫不神遊房奧跡徧門牆思洞希微言窮名象珉陛凌
虛瓊籬鬱起可使龍城愧飾雁墻慙珍日宇奪暉月宮
掩麗昔者姬水壽丘載紀山川之目丹陵負夏僅傳鄉
黨之名歌酒故邑賜復窮乎身世壇篪舊里高會止於
當年銘曰

被物如露偃民猶草解髻傳珠抽衣受寶化違宅火功

超河岸捨我神居興茲靈館八襲豐殿四柱高廊並陳
金璧旁達玉箱從橫雜樹間廁衆芳

祭文

釋奠祭孔子文

於惟上德是曰聖真克明克峻知化窮神研幾善誘藏
用顯仁利同道濟成俗教民道尊功倍德溥化光離經
辨志濟濟洋洋

請雨賽蔣王文

陸周祚脩鍾嶽降精聰明正直得一居貞無方無體不
疾不行化馳九縣位冠百靈東掩屢憊西郊已戢偶龍
矯首泥人鶴立神聽孔殷靈應揮霍儻覩翻伊俄聞倒
洛樂周祈畢恩洽酒闌靈談抗袖鬼笑投柈推茲且引
於萬斯歡

詩

和昭明太子鍾山解講

終南鄰漢闕高掌跨周京復此虧山嶺穹窿距帝城當

衢啟珠館臨下構山楹南望窮淮濱北眺盡滄溟步簷
時中宿飛階或上征網戶圖雲氣龕室盡仙靈副君憐
世網廣命萃人英道筵終后說鑾轡出郊垌雲峰響流
吹松野映風旌睿心嘉杜若神藻茂琳瓊多謝先成敏
空頌後乘榮

以詩代書別後寄贈京邑僚友

余本水鄉士閉門江海隅時逢世道泰蹇足步高衢名
成宦雖立效微功日踈入仕乘肥馬出守擁高車關門

遊昔吏遷亭有故書江派資賢牧宗英出建旗不勞王
布鼓無賴露田車弼政非責實求名已課虛長卿病猶
在修齡疾未祛詎知亭長肉寧挂府丞魚不能未能止
內訟慚諸已僱俛從王事纏舟出淮泗朋故遠追尋暝
宿清江陰明旦一分手翻飛各異林歸舟隨岸曲猶聞
歌棹音行者日超遠誰見別離心夕次冽洲岸明登慈
姥岑水流多迴復余歸良未尋江關一作中寒事早夜露
傷秋草心屬姑蘇臺目送邯鄲道葭葦日蒼蒼親知慎

早涼劉兄消渴病休攝戒無良殷弟癲眩疾行止避風
霜劉侯有餘冷宜餌陟一作休釐方伏子多風咳門冬幸

易將率更愛雅體體弱思自強吏曹勉玉潤諷議勗金
相比部多暇日奚用肆龍章建德何為者無墮無人鄉
記室朋從暇露竭附行商議曹坐朝罷尺板嗣徽芳雙
栖成獨宿俱飛忽異翔眷言思親友沉思結中腸追惟
疇昔時朝府多歡暇薄暮塵埃靜飛蓋遙相迓李郭或
同舟潘夏時方駕娛談終羨景敷文永清夜促膝豈異

人戚戚皆朋一作姪今者一乖離漼然心事差山川望猶近便似隔天涯玉躬子加護昭質余未虧八行思自勉一札望來儀

贈任昉詩

昉為御史中丞後進皆宗之時有彭城劉孝綽劉苞劉孺吳郡陸倕張率陳郡殷芸沛國劉顯及到溉到洽車軌日至號曰蘭臺聚

和風雜羨氣下有真人遊壯矣荀文若賢哉陳太丘今則蘭臺聚萬古信為傳任君本達識張子復清修既有

絕塵到復見黃中劉

漢魏六朝百三家集卷九十三



總校官庶吉士臣侍朝
校對官中書臣石鴻翥

謄錄監生臣張濤